

江寧府志

漢書門			
二	三	九	八
四	八	四	一
冊	架	函	號

內閣文庫			
三	三	九	八
九	四	八	八
函	冊	號	類

內閣文庫			
番號	漢	2398	
冊數	48 ( 30 )		
函號	292	14	

卷一上



江寧府志卷之二十一

人物傳二

明

大學東  
校籍  
局之印

淺草文庫

陳遇字中行其先曹人建炎中南渡遂家建康遇誠純

篤實德宇粹然博學綜覽元末教授温州尋棄官歸

高帝定金陵搜訪人才御史秦元之薦遇宜備顧問

上素聞其名御書稱中行先生以伊呂孔明濟世安

民期之遇就召上與語大悅遇亦竭誠委已禮待日

隆凡三幸其第命以官輒辭不受上即帝位詢保國

安民大計遇以不殺人薄斂任賢為對再除翰林學

士固辭被命使兩浙還稱旨賜金除禮部侍郎又固辭會疾遣醫診視愈入謝上稱君子者再召對華蓋殿賜坐草平西詔賞賚有加西域進良馬諫却之兩除太常卿禮部尚書皆固辭上曰朕不强卿以官成卿之高每進見陳說必根諸仁義人有過被譴皆力爲言上每俞允其優禮寵渥羣臣莫敢望嘗曰卿老矣有子可帶刀侍衛遇伏地對曰臣三子皆幼待成立以効馳驅及卒上親爲文以祭賜葬鍾山稱曰靜誠先生子恭仕至工部尚書弟中復永樂中翰林待詔

周禎字文興江寧人洪武初爲大理寺卿詔與李善長劉基陶安同定律令六部初建以爲刑部尚書廣東建行省以爲叅知政事禎至察屬邑褒循良凡有寔政可紀者皆上其績會下詔開科預聘名儒以待考試後入爲刑部尚書三年以老乞致仕

夏煜字允中金陵人丁仲容以詩名煜爲高弟高帝定金陵辟爲行省博士調浙江行省鄱陽之戰與劉基二三儒臣侍左右受命草檄賦詩橫桴中流助成大功云

王興宗上元人明初爲帳前親兵以材授金華知縣廉

勤公幹甚得民心陞南昌通判嵩州知州僉院任亮集民爲軍興宗曰元末世爵聚則爲兵散則爲民若皆爲軍稅糧何出奏乞止之高帝從之陞懷慶知府請減民食鹽米民受其惠朝京時上問養蠶種田官吏興宗亦在問中高帝曰府主公勤不貪不必問還懷慶未久特改蘇州知府政尚寬簡愛民如子吏卒有過諭之使媿赧旣改又獎勸之人皆感德不敢犯法三年遷河南左布政使赴京辭高帝賜宴賞鈔而遣之

杜環字叔循其先廬陵人父一元宦金陵家焉環好學重然諾周人之急常主事允恭其父執也死于九江家破母張氏老無所依投知交謝不納來金陵訪一元死已久環驚迂率妻子拜畱家貧黽勉敬事如母母性褊急少不愜輒詬怒環戒家人順之勿慢如是者十年母有幼子伯章失所在念之成疾環以事至嘉興遇伯章具以語踰半載始來值環初度母子相持大哭家人忌之環曰此人至情何傷伯章貧乏又度母老不能行竟托故捨去母疾增劇環事之彌謹又三年卒將死舉手向環曰吾累杜君吾累杜君願杜君生子孫賢如杜君言訖而絕環爲治葬且時祀

焉環後為晉府錄事太常寺丞

王顯江寧人號溪漁子有雄才往來江淮間所交多大俠異人天台林右擊劍知兵張穀伴狂飲酒自放于詩皆自負高世顯遊淮上釣水濱望見二人踞坐大笑二人知其非常人也與之語異之引歸逆旅出酒相飲起舞為樂辯難今昔根據理道識者知其非狂生適意則鮮衣怒馬否則汗垢短衣躡市人後市人呵之弗辭也後忽盡悔所為買書數千卷讀之為文章奇偉伉健然恥以自名嘗曰漢無儒者唯賈生諸葛孔明耳唐陸贄粗有識然不足以幾王道所貴乎學將以輔天地所不及耳不然多讀書何為顯父名元賓少從名儒學藝能蓋眾體貌魁然伉俚自負知世變遂決意避世事親孝交友義善料成敗先事不爽方正學嘗曰顯遠利詭隱為一世奇士方之元賓可謂難為父子矣

徐輝祖中山王達長子常侍懿文太子學通經書大義善大書洪武中嗣魏國公建文即位特見信任靖難兵起輝祖帥師禦戰斬其驍將李斌等十數人北師皆懼會京師傳言燕王已歸召輝祖還文皇即位武臣咸附輝祖獨不屈上親見問輝祖不出一語文皇



怒下于獄法司追取供招輝祖捺筆惟書其父開國  
功子孫免死而已革祿米勒歸私第卒

梅殷汝南侯思祖從子尚寧國公主恭謹有謀善騎射  
諸駙馬中高皇愛之嘗命提督山東學校勅云朕觀  
古之帝王必賴賢才輔佐以成治功賢才之立天下  
必待明師教育以成器用爾駙馬都尉梅殷幼承家  
教長能篤學精通經史頗有才華雖迺武臣之裔堪  
爲文儒之宗今特命汝提督山東學校作養人材兼  
理地方等處事務汝惟欽承朕命勿負所托後受命  
命輔建文靖難兵起殷充總兵官鎮守淮安悉心  
禦文皇使人假道殷割其口鼻遣之文皇乃渡泗水  
由六合至京師卽帝位殷尚擁重兵淮上上令公主  
嚙指血爲書招殷殷得書慟哭聞建文君遁去殷曰  
君存與存君亡與亡姑忍俟之乃還京見上上曰駙  
馬勞苦曰勞而無功永樂三年冬入朝都督譚深指  
揮趙曦令人擠殷死笄橋下都督許成發其事上深  
罪二人二人對以上命上大怒命力士持金瓜落二  
人齒斬之謚殷榮定同時駙馬死難者東川侯胡海  
子觀戰于白溝河陣亡功臣李英子堅爲燕兵擒不  
肯降憤恨死

史謹字公謹本崑山人洪武中謫居雲南與王學士景善用景薦爲應天府推官未幾左遷湘陰縣丞尋罷僑居金陵性高潔多才耽吟咏工繪事構獨醉亭賣藥自給以詩畫終其身

楊勉江寧人永樂初自京郡生中進士文皇選曾榮等二十八人同讀書中秘勉其一也時勉年最少風姿俊偉詩文取法漢唐諸頌贊歌詞春容典則出諸作者之右授刑部主事治獄明恕有兼人才召對稱旨特陞本部右侍郎凡諸司有事勉畱心詳察具得幽隱凡奏對之際同事有不能悉勉能歷歷陳之坐事出後叅廣東政八年而卒

丁璿上元人永樂初登進士改庶吉士擢工部主事謫居潞河以修行聞起爲御史巡按徐州擒賊首張晉祥衛輝盜起承命往治縛渠魁散脅從令復業英宗嘉其能陞右僉都時麓川蠻叛召璿馳視至則條上用兵便宜十餘事事定陞右副都御史巡撫滇黔卒劉璉江寧人永樂十年登進士拜御史進山東布政司叅議督理邊儲茂著能聲官至戶部侍郎

李時勉上元人徙安福少有大志七歲小學四書皆成誦成童卽以四勿三省自礪登永樂二年進士選庶

吉士進侍讀上書言事構讒下獄踰年釋之洪熙改元上疏觸忌諱上震怒縛至便殿命力士以金瓜捶之折其肋幾死明日下詔獄宣德初上恨時勉觸仁考怒令縛來面鞫必殺之已又令王指揮縛時勉斬西市王指揮出端西門先所遣使者已縛之從東門入得見上上訊其故憐時勉忠直立脫桎梏復其官正統中遷國子祭酒訓勵諸生週其困乏恩義兼至王振惡其守正因構陷之荷校國學門諸生石大用上章願以身代號哭闕下者數千人以故得解乞致仕去諸生泣送觀者塞途商賈爲之罷市明年開北狩號痛上疏言選將練兵迎駕復仇景泰元年卒諡文毅成化中贈禮部侍郎改諡忠文

李莊字敬中父以功臣子尚大長公主拜灤城侯北征没于王事莊年七歲襲父爵文皇朝納其誥券初未知書有勸之學者乃從劉原博遊襟度洒落刻意詞翰有所作人爭傳之年九十四無疾而逝

劉江江寧人勵志古學恬澹自尚永樂十六年第一甲第三名授編修陞修撰聲譽隆起江不樂仕進自乞教職以閒散適意

姜濬字子澄江寧人工書仁宗在東宮召寫金字經洪



江寧府志 卷二十一  
熙中授中書舍人歷稽勳主事出守廣南府還方險  
遠濬開誠布公凜然嚮風晉按察副使督學政先是  
在中書時宣宗召對便殿命往南雍取監生之能書  
者濬翌日卽就道至則匹馬入太學與祭酒召六館  
生選之得十八人名氏關白禮部而後抵家拜其親  
其慎密如此鄉里稱爲寡過君子云

張益字士謙江寧人幼岐嶷秀異過目成誦少孤事母  
以孝聞撫弟晉有恩義庭無間言永樂進士選庶吉  
士授中書舍人轉大理評事正統戊午改修撰進侍  
讀學士知制誥性儉朴雖貴顯不異儒生三楊甚重

之以詞翰名一時求者全集輒令侍書持軸舉筆一  
揮詞翰兼美人以文豪稱之也先入寇中人王振力  
主親征上命益扈從死于土木之難贈學士謚文僖  
子翊大理評事翔太僕寺丞奕葉相承爲江南名族  
李應禎名姓以字行其先本吳人明初徙江寧力學淹  
雅尤尚氣節慕范文正公之爲人題所居曰范齋中  
景泰癸酉舉人入太學中官牛玉請爲塾師固拒之  
選授中書舍人屢有建白荆襄流民相聚朝議恐爲  
亂欲逐散之應禎疏言民墾田築室爲定居逐之祇  
益亂耳不若因而撫之便後增置郡縣如其言尋直

文華殿有旨寫佛經上疏直諫累遷南太僕少卿乞  
休氣宇嚴峻若不可親然喜交遊尤好汲引後進朋  
友死經紀其喪恤其妻子顧華玉稱其一介不取予  
文翰如鉞戟利劍掉以淮陰之雄可謂介而文焉  
王麟上元人宣德己酉鄉貢授儀真教諭轉國子監學  
正擢四川按察僉事督學政隨改山東政聲稱最天  
順初進階奉議大夫杜門不出卒年八十有三  
周瑄字廷玉其先陽曲人宣德乙卯貢士初爲刑部主  
事歷陞南京刑部尚書致仕瑄性寬大善議論守  
廉故鄉無田宅可歸遂家江寧卒諡莊懿贈太子少

保

王濬字文通上元人正統九年鄉試經魁任山東鰲山  
衛學教授鰲山濱海教法未備首以十事聞于朝有  
旨頒行天下爲武衛學式尋擢北雍博士以文學見  
稱天順改元陞廣西提學僉事未幾丁外艱服闋以  
母老遂致仕

王一居上元人自少讀書樂善初爲太常贊禮郎宣德  
初舉南郊之禮一居禮度詳雅上嘉之遷少卿正統  
間死于王事贈太常寺卿同時死事者溧陽有戴慶  
祖亦以諳禮文爲太常少卿歿贈正卿

江寧府志 卷二十一  
徐承宗中山武寧王曾孫明太祖賜中山第于秦淮之濱榜曰大功坊世家焉承宗沉靜簡雅有祖風襲爵爲魏國公天順改元守備南京號令嚴肅宗族家衆罔敢撓法者內守備諸司咸敬憚之居十六年人未嘗見其坐立傾側喜怒橫發至今傳頌以爲得大臣之體卒葬鍾山祖塋之次

陶元素字希文上元人正統元年舉進士以親老乞歸養教授諸生不復仕天順己卯成化辛卯歷聘浙江河南典鄉試號稱得人居進士典試重其品也自少懷奇負氣好交結不附匪人晚益自重雖貧甚自守益堅未嘗干人以私自六卿以下慕其高風皆造其門家居吉凶禮悉遵朱文公而以時制參之手不釋卷經史外星曆筮卜諸書靡不精究詩文渾厚典則卒年七十有四

顧儼字廷望其先吳人祖至善以富室徙京師遂家金陵儼幼負美質早從里師遊卽能詩賦工書法累試不偶乃教授鄉里從學甚衆正統中巡按御史齊公以經明行修薦于朝召授嘉興縣學訓導教士有方多所成就登甲科拜陝西道御史儼持廉秉正糾擊無所避人嚴憚之奉敕清理福建軍政察邊軍詭名

勾擾之弊罪其奸而雪其誣民始獲安沙汀民叛誅其首惡餘黨悉平陞廣東僉事時新會陽江有賊數萬儼提兵五千直搗賊巢斬獲無筭幕府上其績儼在軍中不解甲者數月冒犯霜露以勞疾乞歸儼性孝友幼侍季父叔謙謙嘗遘疾幾危儼刲股以療而愈晚結屋城東時與鄉耆故友把酒賦詩世事不以掛懷人皆高之

倪謙字克讓上元人正統四年進士第三人生有奇質奉使朝鮮丰采凜然卽席揮毫略不經意至今國中梓行其文天順初屢遷學士簡侍東宮己卯主試順天黜權憲之子誣搆謫戍開平成化初復舊職與子岳同日奉命入史館纂修英宗實錄進禮部右侍郎轉南禮部尚書乞致仕卒贈太子少保諡文僖謙德量寬洪誠信無僞喜獎後進嗜學至老不倦立朝多所建明子岳阜各有傳

沈琮字廷器其先汝南人洪武中祖有死事者賜葬江寧因爲江寧人琮舉正統十三年進士爲御史見所行非法輒彈治之母少紉出爲四川僉事時松藩地近蜀數嘯聚爲肘腋憂朝議以琮在蜀久威望素孚乃推副使往鎮之暮月遂下黑虎諸寨松藩平事聞

賜璽書褒之尋乞休歸平生忠信好修恥以能自表見人人稱爲長者

陳壽遼東人十歲能屬文家無擔石意恒廓然嘗遊市得遺金候其人歸之爲諸生屢不第乃遍遊塞上欲持戈建功名久之無所遇仗劍歸故鄉習舊業舉成化丙戌進士累官大理寺丞弘治中火篩寇邊壽以薦巡撫延綏聞命馳至軍中首卹陣亡官兵更置諸路將領分布兵馬屯要害地令緩急相應援時用間謀遠斥堠軍大振每戰躬擐甲胄爲士卒先凡三十餘戰擒斬百計偶遇敵大舉先以百騎嘗我諸將赴之壽不從自出帳前擁數十騎坐胡床指麾飲食若無事然敵望見疑之引去指授諸將所在有功上手勅勞之正德中爲南刑尚書尋致仕壽立朝四十年功伐較然而廉名尤著解官不能歸旅寓留都環堵蕭然遂家焉

賀確字存誠先世隴西人徙金陵行古而醇學博而要少事博士業一不利卽棄去曰是不足以盡吾學也遂大肆其力於六經子史以至天文地理醫卜之書無不覽究爲文辭下筆輒有古風以菊有隱操篤愛之自號友菊處士其於功名富貴淡如也與諸名公

江寧府志 卷二十一  
十三  
為古道友自視歆然而能忘人之勢或語及古今成敗人物臧否政事得失如倒囊出物聞者聳聽學士周敘以其有史才薦修宋遼金三史力辭不就年九十三卒

金潤字伯玉上元人年十二能賦詩正統間鄉貢授兵部司務才敏有識有言赤斤蒙古所產可資戎器欲取之潤曰豈可使狄人知此遂寢已已瓦刺入寇上欲親征潤白于尚書鄺埜曰細事未可重煩車駕又請于王翱胡濙力上疏不報之變潤言于司馬于謙請堅壁清野以待之謙從其言軍國大計每諮議京師晏然擢南安知府政暇彈琴寫畫賦詩以子貴乞休家居手製床几十事號洞天十友風神如仙壽九十賦詩一章而逝

金紳潤之子景泰甲戌進士改庶吉士授刑科給事中同時張寧疏論指揮門達竊美威柄及建議力言都御史王竑剛毅直諒可屬大事又言時政八事多見采納歷官刑部右侍郎性狷介嚴毅門無雜賓鄉里富室無一識者成化間江西大旱命巡視以便宜行事至則休力罷征裁冗減獄境賴以寧年四十有九卒于官子麒壽文學孝友舉進士未仕而卒

童軒字士昂南欽天監籍景泰辛未進士授南吏科給事中時貢翠毛魚鮓諸物以萬計軒上疏止之又陳弭盜安民數事多見採納蜀寇起命軒往撫軒遍歷賊巢宣布恩威賊羅拜乞生悉遣散三原王恕曰公不加兵而四境寧官至南禮部尚書致仕家無餘貲卒贈太子少保賜祭葬子時以廕叙官知州

羅麟字仲祥江寧人性敏善書舉景泰四年鄉薦以孝友著名有大度屢遷廣東叅議部有冤獄數歲不決麟至立雪之竟抵誣者罪麟性寬緩及臨政擊斷毫無撓滯人益多之子輿有孝行弘治辛酉舉人輅正德戊辰進士皆知名

湯胤勣字公讓東甌王和之孫少負才好使氣爲應天諸生與府尹不合輒攘臂去題詩學門有從今袖却經綸手且向江頭理釣絲之句嘗在江陰其縣令虐民將受代胤勣率少年數人直入縣廳反縛之狀其罪送之上官上官大駭并收下獄凡數歲會赦乃出周文襄奇其才疏薦赴京于忠肅方督諸軍立試之摘古今將畧及兵事以問應對如洪鍾忠肅曰此文武材也入對以爲錦衣百戶後以裨帥力戰孤山堡衆寡不敵死之勣負氣不能俯仰狗時好詩豪邁奇

崛援筆揮洒如風雨觀者奪魄每就人席上操觚立成數十章

鄭禮字中夫江寧人舉景泰七年鄉薦任襄陽府通判有平寇功當事者已具疏禮固辭進大名府同知課爲三輔最擢守南安郡苦水患禮欲發倉賑之監司難之曰未上請奈何以便宜行事禮曰待報而後發民皆溝壑矣如以矯制罪守守無所恨事聞于朝亦不之罪屬邑徭役不均禮酌其中以便民郡故椎魯禮修學校嚴課程士風遂振以年老乞歸郡人至今尸祝焉孫濂另有傳

凌文字從周上元人天順元年進士授戶部主事進郎中以才幹保陞湖廣叅議時湖賊呂總聚萬人擄掠文捕戢悉平斬黃大饑撫按屬賑濟所活萬餘人平生謙重不事外飾以文學重于時子雲翰弘治壬戌進士知吉水縣邑素隘訟雲翰示以禮讓民感化訟爲之衰陞金州知州未任歸卒

朱貞字惟正旗手衛籍天順元年進士知磁州時中官取異魚民爲所苦丞以下率避去貞恐益累百姓乃禱于河魚涌至境內以安改鄧州至卽疏革陝西等處驛夫與州民更番走遞以甦土著成化丙戌襄盜



起軍興孔棘將次鄧貞夙戒諸生有幹局者分主供餉士卒無敢以非禮加諸生民賴以不擾進四川叅議督松潘儲地故險遠轉輸者多侵牟甚則逋逃以爲常貞勤以率下飛輓有方宿弊盡洗且善撫禦西羌剽掠者不入境黑虎寨恃頑不服貞與總戎計平之事聞行賞貞以老乞休貞性篤實痛親早逝每享祀輒泣下歸與里中士大夫爲真率會優游十有五  
年而卒

盧雍字廷佐江寧人天順丁丑進士爲兵部武庫主事進郎中以才器爲大司馬白圭王竑所重累官湖廣左布政使皆有政績居父喪廬于墓側三年有產芝之異詔旌其門

龍夔江寧人戶部員外郎峭直不畏疆禦有祠官附權貴乞免家徭役夔執不可青徐大饑受命往賑存活無算人以爲得富鄭公遺法以老致仕子雨龍泉教諭善詩卒年九十鄉里甚重之

沈鍾字仲律上元人爲諸生時宿學舍閉戶讀書敝緼自甘成天順庚辰進士歸省父病侍踰年卒居廬三年未嘗言笑服闋授吏部主事疏乞就養改南禮部俸資必跪奉其母侍郎章綸嘗入賀欲委之同列鍾

曰臣子事君可與人較乎章揖謝所友惟章楓山懋  
羅彛正倫等時稱十君子尋拜按察僉事考績擢副  
使督學湖廣時座主尹公晏秉政當候見鍾問所居  
李文正顧坐客曰今之不識相門者仲律一人耳改  
督學山東爲諸生改五經文後子爲楚府儀賓遂乞  
致仕歸金陵無所棲息毫不介意平生賦詩萬首文  
字之外世事無所聞年八十弟鎧舉成化壬辰進士  
李旻字景陽江寧人景泰丙子鄉貢拜南監察御史公  
平廉明以風裁自持擢雲南按察僉事辨雪冤獄貪  
墨望風引去生平敢尚名檢居官猶寒士家無餘貲

鄉里重之

王徽字尚文南錦衣衛籍天順庚辰進士拜南禮科  
事中卽疏五事曰親覽史書開言路重大臣選良將  
全內官時闡宦牛玉專恣大臣失職皆時所忌徽劾  
奏剴切謫普安州判官考滿歸杜門不出弘治甲申  
薦起陝西左叅議逾二年乞致仕年八十有三卒子  
帝另有傳

倪岳字舜咨文僖公謙之子文僖奉命祠北岳夫人姚  
氏夢緋衣神人入室而岳生五歲侍父問曰天上更  
有天地下亦當有天文僖異之舉天順八年進士授

編修進侍讀每進講敷古義陳時政言辭剴切吐音  
洪亮上喜進學士擢禮部右侍郎晉尚書是時儀制  
如徽號婚冠大喪祧祫及奉慈殿制皆前代所未有  
多所擬定革淫祠正神號禁齋醮止胡僧請却西戎  
貢獅諸疏皆出手筆累知貢舉損益舊法遂不可易  
值遣祭靈祐官金闕玉闕岳奏曰徐知證知詳唐叛  
臣之裔也祀典不敢議廢但歲時典祀一祠官之職  
耳宗伯何與焉遂爲令弘治中改南吏部尚書尋改  
兵部叅贊機務岳秉正達變不激不隨百廢頓舉兵  
民倚重相戒不敢犯法畱都肅然適清寧宮災岳條  
上修省二十八事上嘉納之轉吏部尚書獎恬抑躁  
不恤恩怨正色昌言干謁消阻除目每下翕然稱快  
或諷其甄別太峻岳曰冢宰職固如是也迨病猶手  
書薦稿竟不及家事卒年五十有八贈少保賜諡文  
毅父子得並諡文自公始岳性孝友篤念故舊雖奕  
世貴顯家無遺財在翰林時卽畱心政務凡生民休  
戚理財籌邊莫不諳習每大廷集議岳以片語折之  
無不敬服又長于奏議一寫千言春容暢達考古準  
今會文切理下至瑣屑案牘吏人旁候運筆如飛畧  
不經意岳于諸卿中推遜馬文升然于文升請改北

獄請增蘇松折糧亦無所徇子霖雲南澉江府知府  
孫民悅蘄水令曾孫翰儒尋甸知府

翟瑄字廷瑞南太醫院籍與弟瑛並有才名瑄舉天順  
甲申進士爲奉化令有善政擢御史執法不撓進僉  
都御史巡撫山西有平賊功上賜敕勞焉晉左都御  
史尋陞刑部尚書數斷大獄多所平反雖徒杖以下  
亦詳讞時稱無冤民瑛丙戌進士讀中秘書出爲禮  
科給事中改兵科封事數十上于時政多所規切上  
嘉納之歷太常卿以病乞骸骨歸瑛孝友真實事兄  
白首相敬無異事父世稱兄弟之美必曰二翟云

沐璘字照寧王曾孫生于金陵元津橋西里第初以父蔭  
爲千戶天順戊寅入朝會見總兵官都督璘計至上  
念沐氏世守雲南邊彛信服不欲以兵政更委他人  
遂召璘至便殿陞右軍都督同知掛鎮南將軍印乘  
傳之鎮璘承命感謝至則修飾城壘增貯廩庾興學  
校輯姦宄旣而祿谷塞叛命都指揮高遠勦平之霑  
益州賊阿賽與土官適仲相仇殺命都指揮張諒剪  
除之隴州蠻酋木梅罕賢麓寇思不法等爭構劫掠  
會集鎮巡請于朝相機攻守邊圉輯寧事聞賚白金  
文綺有加成化初移鎮金齒恩浹士卒化行民黎獲

疾卒歸葬江寧瓚質幹魁碩器宇弘邃樂善容物而尤優于謀畧精于騎射南人至今思之

史瑄字彥章其先延安人父以軍功爲南京畱守後衛指揮瑄通敏厚重議論英發游武學爲大司馬李公所知布袍蔬食門無私謁累陞叅將分守靖州靖爲古槃瓠種恃險桀傲瑄宣布威德遠邇帖然而清慎之操終始一致雅有儒將風

丁鏞字鳳儀上元人幼穎敏俊秀嘗曰士必讀人間未讀之書乃不愧古人成化己丑進士任南刑部主事歷郎中守興化嘗斷疑獄人以爲神性嗜學工詩尤愛作山水多宿山寺不出則焚香一寓中左經右史頽然自適

任彥常字吉夫江陰衛籍童年游庠刻苦勵學天順壬午鄉試第一人成化壬辰進士授南戶部主事歷陞福建提學甚得士心弘治改元致仕歸八府諸生赴京奏保凡上十二章不報從容林下者十餘年

金章字質菴上元人成化乙未進士令黃梅有惠政不事苛刻聽決催科率取式前令民甚便之擢南道御史章父張素著高風有竹溪集同里張侍郎志淳贈以詩有竹比孤高水比清清高誰得似先生之句次

子冕孫清皆舉進士瀚舉人

潘珩字重玉上元人父傑工部郎中珩少有文名領成化庚子鄉薦除九江同知改南康修白鹿書院置田五頃師生至今賴之歲饑發粟賑貸全活殆萬人改袁州革弊興利士民交頌焉

梅純字一之一字損齋駙馬都尉殷曾孫幼穎拔多才以儒士領成化丁酉鄉薦辛丑登進士授懷遠縣清介自守與當道不合遂上章乞歸補蔭孝陵衛指揮使正德初陞中都畱守未三載以母老乞致政生不著學不厭見奇書嘗解衣購之爲文博雅詩清奇厚交友極謙謹性亦寡合篤信程朱所藏書皆手自抄校崔後渠嘗題其所書易解以訓諸子偶病預知卒期屬纊之際神氣清暇如常

王敞字漢英一字竹堂錦衣衛籍少爲諸生有時名成化辛丑會試第三人授刑科給事中出閱四川松潘諸鎮邊儲還上便宜請罷免建昌礦夫從之孝宗卽位賜一品服使朝鮮却女樂斥餽遺屬國重之歷轉通政司使凡有章奏置大匱列後堂親司其鑰胥吏無所容奸尋陞兵部左侍郎進尚書敞以邦政重任勤慎益至武功黃冊舊藏內府例納賄乃得對勘敞

請騰副于部以便選法提督戎政賜麟玉值寧夏悖  
叛勢甚猖獗敵仰贊廟謨易置諸將逆黨伏誅以功  
加宮保蔭子錦衣四川盜起敵請增諸要地兵備定  
賞罰條格所用總制大臣及諸將佐皆叶時望盜以  
平乞休歸居東山開詩社天性孝友事母盡養與人  
和易絕無崖岸而廉潔之操確不可易銓曹贈官疏  
特以清慎稱之

蔣法字惟深上元人成化丁未進士官參議性朴實孝  
友少爲諸生居下街口有樓二間誦讀其上及罷官  
歸猶居此樓杜門讀書人罕覩其面有通鑑綱目一  
部每閱一過卽以一色筆評註凡數閱五色皆備字  
畫精好顧文莊曰前賢操履清貞矯矯人外卽其終  
身學古無他嗜好亦足見淳朴寡欲之一端也會孫  
尚彬力學服古事繼祖母繼母皆盡孝養歲貢入京  
未仕而卒彬子士瑞辛卯舉人

倪阜字舜薰一字東岡文毅公弟丁未進士選庶吉士  
授工部都水司主事陞郎中文毅公卒請于朝護喪  
歸友愛過人陞山東分守叅政時地方多盜阜計擒  
首惡餘黨悉降改守東兗值廷遣勘地極力區畫民  
賴以安陞四川布政卒于岳州囊橐蕭然至無以爲

江寧府志 卷三十一  
欽其清苦如此

陳鎬字宗之其先紹興人以欽天監籍家南京少與弟欽俱有文名成化丙午同舉應天鄉貢鎬第一人明年同舉進士皆由郎署鎬山東督學副使欽廣東督學副使時人謂之兄弟三同鎬在山東成就學者甚多公廉詳慎登降之序皆自書之齊魯間言衡文者必首稱焉歷官副都御史巡撫湖廣欽在南武選時會武庫郎婁性被誣下獄欽奮身疏其寃詔并逮欽同繫者二年婁病篤欽周旋之得不死出知廣平周達民隱臨事果決百廢具修時巡九縣問民疾苦郡

人號為陳母

吳彥華字汝和江寧人成化辛丑進士歷戶部郎出守荊州郡故多水患彥華築堤二十餘里至今號吳公堤郡多流移彥華善撫字歲增戶口至九千有奇墾田四萬餘畝為守七年進四川叅政開闢瞿塘三峽古道令人得陸行無風波之患事聞劉瑾以功不由已出悉械繫赴詔獄衆以賄免彥華獨坐黜歸瑾誅復官浙江布政以疾卒疾革語其妻曰我平生不愛錢今死母以為市遺命殮畢三日即出郡邑賻贈一無所受



劉蒼字伯春廣揚衛千戶九歲嗣官十五歲入武學篤志刻勵每晨起讀將鑑一篇始進食通小學四書史略七經諸籍又能書嘗得遺牒于道乃解戶所領千金部收也蒼候其地三日其人乃號呼來覓蒼舉與之其人泥首請以數金酬蒼笑而不受自以位卑不克行其志乃擇師教子于時有趙經先生者亦千戶也明經而習舉子業遵禮尚志跬步不苟蒼以爲賢遣子麟師事之每獲折俸布帛必以帛進先生而以布自衣經念麟貧不受蒼曰不贊何以遣吾子麟卒成進士爲名臣經之父曰趙端蒼尊行也敦廉節不

妄交獨敬重蒼一日與蒼過其家命家人具饌以食而饌不時具蒼退端怒欲出子婦麟時從學經家奔告蒼蒼來曰朋友與家室孰重以小故黜之如爾孫何端始解復具饌歡飲而罷其見敬禮如此指揮吳英孤介自守喜蒼同志每從晰疑義及麟舉進士謁英英呼之曰善承爾父志無墨以貽羞否則雖官卿相吾不復見矣又指揮龔海于經爲前輩甘貧好學年七十矣搗藥以賣不二價好讀孟子每從經聽講必正講席而已旁聽之先後廿年中又有姚福張晟兩千戶福字世昌一字守素居近青溪有屋廿楹扁

曰青溪精舍每遇俸入輒以置書訓諸子姪里中多  
從問字喜談不倦有求詩若文者亦輒應之嘗以職  
守所羈不得時時親青燈磨鐵硯爲恨著有風樹藁  
定軒集青溪暇筆窺豹錄避喧錄諸書晟字德齋嗜  
古好學能大書祖父二代未葬晟旣襲職卽損衣食  
積官俸徒跣覓地日行數十里雖隆冬盛暑不輟乃  
得地近郊葬焉日手一編稍有所入卽以市書不得  
不休著有明德攝生宗法理家諸圖說精易數及星  
曆之學晚年潛心內典窮究性命先知化期援筆題  
詩曰老身原是辟支身火裏金剛水月心今日烟飛

